

Akileraarusiineramik aalajangiisartut aalajangiinerat

Ilisarnaat:	2016-15780
Ulloq aalajangiiffik:	27. april 2017
Aalajangiineq saqqummiunneqarpoq:	
Ukioq aningaasarsiorfik:	2014 - 2017
Suliaq:	Akileraarutit
Suliamut oqaasertaq:	Kommune akileraarfiusoq

Eqikkaaneq

Naammagittaalliuuteqarnermi pineqarpoq kommunep akileraarfiusussap aalajangerneqarnera

Suliami tunngavippiaasut

Naammagittaalliuuteqartoq Pituffimmi (Thule Air Base) suliffeqarpoq. Naammagittaalliuuteqartoq suliffeqarfimmit ineqartinneqarpoq, sulisitsisuatalu inigisaata nalinganut akileraaruteqarnissaa nalunaarutigisarpaa.

Naammagittaalliuuteqartoq Kommuneqarfik Sermersuumi inissiamik pigisaqarpoq, naammagittaalliuuteqartorlu tassani najugaqartutut allaqqasimavoq 2016-ip tungaanut najugaqarnerup Pituffimmut allanngortinneqarnerata tungaanut. Naammagittaalliuuteqartup inigisani sulinngiffeqarnermini najugaqarfigisarpaa, aallaraangalli iniutaa atorneruttarpoq.

Naammagittaalliuuteqartup paasinninnera

Naammagittaalliuuteqartoq isumaqarpoq kommune akileraarfiusoq tassaassasoq Pituffik, tasaanani Kommuneqarfik Sermersooq.

Tamatumunnga makku tunngavigineqarput:

- Naammagittaalliuuteqartoq ukiuni arlalinni Pituffimmi suliffeqarsimavoq suliffimminullu atatillugu Pituffimmi angerlarsimaffeqarsimalluni
- Kommuneqarfik Sermersuumi inissiaq pigisani aningaasaliinissaq siunertaralugu pisiarisimavaa. Iniutaa attartorneqanngilaq. Pigisai iniutaaniippat sulinngiffeqarnermilu najugaqarfiusarpoq
- Inunnik nalunaarsuiffimmut najugaq 2016-imi Pituffimmiittutut allanngortinneqarsimavoq.

Inatsisit malittarisassaannut inatsisillu atornerqarnerinut innersuussutit

Akileraartussaataitaq ukioq sioqqullugu septembarip aallaqqaataani kommunemi nalunaarsorneqarfigisamini aallaavittut akileraartartussatut isigineqartarpoq. "Najugaq", Aningaasarsianit akileraarutit pillugit inatsimmi § 1-imi aamma 2,0-mi akileraartussaataitanermut aalajangersakkat naapertorlugit paasineqassaaq, tak. Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi §§-it 1, 2 aamma 68.

Kommune akileraarfiususaaq akileraarutigineqartussat procentinik qanoq annertutigisunik annertussuseqarnissaannut aalajangiisuusarpoq. Ukiut tamaasa ukiumi tullermi procentit annertussuseriumaagaat nalunaarutigineqartarput. Ukiumut aningaasarsiorfimmumut 2014-imut tamanna pivooq Nalunaarutikkut nr. 77-ikkut 29. november 2013-meersukkut. Kommuneqarfik Sermersuumut ukiumi aningaasarsiorfimmu 2014-imi akileraarutaasussatut nalunaarutaasooq 42%-iuvoq. Piffinni kommuneqarfiit avataanniittuni akileraarutaasussatut nalunaarutaasooq 36%-iuvoq.

§ 1-imut oqaaseqaatini takuneqarsinnaavoq Kalaallit Nunaanni najugaqarnermut aalajangersaanissamut suut piimasaqaataanersut. Tunngaviusumik ukioq naallugu angerlarsimaffeqarnissaaq pisariaqassaaq, aammalu sumi najugaqarnermut aalajangersaanissamut piimasaqaatit naammassalluni. Tassa sumi najugaqarnissamut ineqarnermut tunngasut aalajangiisuusarput, inunnilli nalunaarsuiffimmumut sumit sumut nuunermik nalunaarutit tunngaviuallaaratik.

Inuk akeqanngitsumik ajunngitsorsianut akileraaruteqartussaavoq, ass. akeqanngitsumik ineqartinneqarnerminut illoqartinneqarnerminullu. Ukiut tamaasa akileraarusiinissamut akiusussat nalunaarutigineqartarput. Ukiumut aningaasarsiorfimmumut 2014-imut akeqanngitsumik ineqartinneqarnermut illoqartinneqarnermullu akiususaaq taamaalilluni Nalunaarutikkut nr. 75-ikkut aamma 76-ikkut 4. oktober 2013-imeersutigut nalunaarutigineqarpoq.

Nalunaarut naapertorlugu akeqanngitsumik ineqartinneqarneq imaluunniit ineeraqartinneqarneq (ini igaffeerartalik) assigisaalluunniit suliffeqarfimmi sulinermut atatillugu najugaqarfigitinneqartut suuneri nassuiarneqarput. Najugaqarfik inissiani najugaqarfittut isikkoqassanngilaq.

Akileraarusiinermik aalajangiisartut nalilersuineri tunngavilersuutaallu

Akileraartartoq kommunemi ukiup siuliani 1. september najugaqarsimasooq, kommunemut tassunga akileraartussatut isigineqarpoq. "Najugaq", Aningaasarsianit akileraarutit pillugit inatsimmi § 1 aamma 2 naapertorlugit paasineqassapput, tassani aalajangersarneqarmat inuup qaqugukkut Kalaallit Nunaanni akileraartussaataitalernera. Tassa sumi najugaqarnissamut ineqarnermut tunngasut aalajangiisuusarput, inunnilli nalunaarsuiffimmumut sumit sumut nuunermik nalunaarutit tunngaviuallaaratik.

Najugaqarfiit marluusimappata, akileraartartoq qulaani inatsisit malittarisassaannut inatsisillu atornerqarnerinut innersuussutini taaneqartut aalajangiinermi tunngaviit malillugit ineqartutut isigineqartarpoq. Qularutissaanngilaq naammagittaalliuuteqartoq Kommuneqarfik Sermersuumi

angerlarsimaffigisinnaasaqarnera, naammagittaalliortormi ineqarfiuteqarpoq allanut attartortinneqarsinnaanngitsumik. Aammattaaq qularutissaanngilaq naammagittaalliuuteqartup piffissap annersaani Pituffimmiittarnera, naammagittaalliuuteqartormi tassani suliffeqarpoq sulinerminullu atasumik najugaqarluni.

Naammagittaalliuuteqartup Thule Airbasemi ineqarnera najugaqarfittut isigineqarsinnaanngilaq, Kommuneqarfik Sermersuumimi namminerisaminik angerlarsimaffiuteqareeremat.

Akilerarusiineramik aalajangiisartut aalajangiinerat

Akilerartarnermut Aqutsisoqarfiup, akilerartartup Sermersuup Kommuneanut akilerartartutut isigineqartariaqarneranik aalajangiinera **aalajangiusimaneqassaaq.**

Inatsisit tunngavigineqartut: Aningaasarsianit akilerartutit pillugit Inatsisartut inatsisaanni nr. 12, 2. november 2006-imeersumi §§-it 1 aamma 68 aammalu Nalunaarutit nr. 75, 76 aamma 77.